

Melayu bukan dari Yunnan

BANGI 5 Sept — Bangsa dan rumpun Melayu bukan berketurunan migrasi penduduk dari wilayah Yunnan di China, kata dua orang penyelidik dari Universiti Kebangsaan Malaysia (UKM), di sini, hari ini.

Pengarah Institut Alam dan Tamadun Melayu universiti itu, Prof. Datuk Dr. Wan Hashim Wan Teh dan timbalannya, Prof Dr. Nik Hassan Suhaimi masing-masing berpendapat bahawa manusia telah mendiami Alam Melayu sejak 35,000 tahun dahulu berasaskan bukti-bukti arkeologi.

Pada satu persidangan akhbar di UKM, di sini, mereka berkata, teori migrasi penduduk dari Yunnan atau mana-mana tempat di Asia ke Alam Melayu di zaman pra-sejarah mengikut gelombang iaitu gelombang proto-Melayu dan gelombang Deutro-Melayu yang dipercayai umum pada hari ini, tidak dapat dibuktikan.

Kedua-dua orang penyelidik itu berpendapat pada tahap 35,000 ke 11,000 tahun dahulu, manusia di Alam Melayu yang berasal dari satu baka mengamalkan kebudayaan yang sama.

"Ini kerana di waktu itu Alam Melayu merupakan sekeping tanah besar Pentas Sunda dan Pentas Sahul yang timbul kerana dunia pada waktu itu berada pada zaman air batu (Prestosen) dan paras air laut turun," kata mereka.

Pada waktu itu, tambah mereka, manusia di Alam Melayu bebas bergerak tanpa menggunakan perahu.

Kedua-dua orang penyelidik itu ialah

antara 60 orang budayawan dan sarjana daripada pelbagai universiti dan badan penulis serta institusi kerajaan dan orang perseorangan yang mengunjungi Kunming dan beberapa tempat bersejarah di Yunnan pada akhir bulan lepas.

Prof. Dr. Nik Hassan yang membuat penyelidikan lebih daripada 20 tahun untuk membuktikan bahawa teori Barat yang menyatakan rumpun Melayu berasal daripada kaum migrasi Yunnan, berkata, bukti-bukti yang terdapat daripada penduduk Yunnan itu jelas bahawa rumpun Melayu bukanlah berasal dari daerah itu tetapi sebaliknya mereka ialah penduduk asal Alam Melayu.

Menerusi penelitian terhadap bahan tulisan dan kajian yang sedia ada tentang linguistik, budaya, dan antropologi masyarakat di Yunnan dan disokong pula oleh pola fenomena migrasi umat manusia, tiada bukti yang menunjukkan pertalian ras atau keturunan antara 26 kelompok minoriti pribumi wilayah Yunnan dengan rumpun bangsa Melayu-Polinesia yang kini tinggal menetap di wilayah Alam Melayu atau Dunia Melayu-Polinesia.

Sehubungan itu, mereka yakin teori bahawa bangsa dan rumpun Melayu berasal dari wilayah Yunnan ialah teori spekulatif yang harus ditolak kerana tidak ada fakta-fakta yang kukuh bagi menyokong teori itu. — Bernama.

*Kutusan Malaysia,
6 September 1994.*

Melayu bukan keturunan Yunnan

BANGSA dan rumpun Melayu bukan berketurunan migrasi penduduk dari wilayah Yunnan di China, malah manusia sudah mendiami Alam Melayu sejak 35,000 tahun dahulu berasaskan bukti arkeologi.

Sehubungan itu, teori yang mengatakan bangsa dan rumpun Melayu berasal dari wilayah Yunnan sebenarnya bersifat spekulatif yang harus ditolak kerana tidak ada sebarang fakta kukuh bagi menyokongnya.

Hal ini dijelaskan oleh dua penyelidik dari Universiti Kebangsaan Malaysia (UKM), Bangi — Pengarah Institut Alam dan Tamadun Melayu, Prof Datuk Dr Wan Hashim Wan Teh dan timbalannya, Prof Dr Nik Hassan Suhaimi.

Bercakap dalam satu sidang akhbar di universiti itu Isnin lalu mereka menegaskan bahawa berasaskan bukti arkeologi adalah jelas manusia sudah mendiami alam Melayu sejak 35,000 tahun dahulu.

"Teori migrasi penduduk dari Yunnan atau sebarang tempat khususnya di Asia ke

alam Melayu di zaman prasejarah mengikut gelombang, iaitu gelombang Proto-Melayu dan gelombang Deutro-Melayu yang dipercayai umum pada hari ini, tidak dapat dibuktikan," kata mereka.

Kedua-dua penyelidik itu berpendapat bahawa pada tahap 35,000 ke 11,000 tahun dahulu, manusia di alam Melayu yang berasal dari satu baka mengamalkan kebudayaan yang sama.

"Ini kerana di waktu itu alam Melayu adalah sekeping tanah besar Pentas Sunda dan Pentas Sahul, yang timbul kerana dunia waktu itu pada zaman air batu (Prestosen) dan paras air laut turun," kata mereka.

Waktu itu, manusia di alam Melayu bebas bergerak tanpa menggunakan perahu.

Mereka berdua adalah antara 60 budayawan dan sarjana dari pelbagai universiti, badan penulis dan institusi kerajaan dan orang perseorangan yang mengunjungi Kunming dan beberapa tempat bersejarah anjuran Gabungan Persatuan Pe-

nulis Malaysia (Gapena) di Yunnan akhir bulan lalu.

Prof Dr Nik Hassan terbabit dalam penyelidikan lebih daripada 20 tahun berhubung dengan teori Barat yang menyatakan rumpun Melayu berasal dari kaum migrasi berketurunan Yunnan.

Menurutnya, bukti yang terdapat daripada penduduk Yunnan itu jelas bahawa rumpun Melayu bukanlah berasal dari daerah itu, sebaliknya mereka ialah penduduk asal Alam Melayu.

Menerusi penelitian terhadap bahan tulisan dan kajian yang sedia ada mengenai linguistik, budaya, dan antropologi masyarakat di Yunnan dan disokong oleh pola fenomena migrasi umat manusia.

"Tiada bukti menunjukkan pertalian ras atau keturunan antara 26 kelompok minoriti pribumi wilayah Yunnan dengan rumpun bangsa Melayu-Polinesia," katanya.

Rumpun bangsa Melayu-Polinesia kini tinggal menetap di wilayah alam Melayu atau Dunia Melayu-Polinesia.

Berita Minggu,
16 September 1994